

Na osnovu člana 39. Ustava Hercegovačko-neretvanskog kantona (Službene novine HNK, broj:2/98, 4/00 i 7/04), Skupština Hercegovačko-neretvanskog kantona na XXV sjednici održanoj dana 28.06.2013. god. donosi:

ZAKON **O VODAMA HERCEGOVAČKO-NERETVANSKOG KANTONA**

I. OSNOVNE ODREDBE

Član 1. (Predmet Zakona)

(1) Ovim zakonom uređuje se razvrstavanje površinskih voda, vodno dobro i vodni objekti, upravljanje vodama, korištenje voda, zaštita voda, uređenje i održavanje vodotoka i drugih voda i zaštita od štetnog djelovanja voda, informacijski sistem voda, vodni akti, ograničenja prava vlasništva korisnika zemljišta, organizacija upravljanja vodama, financiranje upravljanja vodama, nadzor nad provođenjem zakona, kaznene odredbe i druga pitanja značajna za vode unutar teritorije Hercegovačko-neretvanskog kantona (u daljnjem tekstu: Kanton), a koja su Federalnim zakonom o vodama (Službene novine FBiH, broj:70/06) (u daljem tekstu: Federalni Zakon) stavljena u nadležnost Kantona.

(2) Upravljanje vodama obuhvata zaštitu voda, korištenje voda, zaštitu od štetnog djelovanja voda i uređenje vodotoka i drugih voda.

Član 2. (Svrha Zakona)

Svrha ovog zakona je osiguranje upravljanja vodama s ciljem:

- a) smanjenja zagađenja voda, postizanja dobrog stanja voda i sprečavanje degradacije voda;
- b) postizanja održivog korištenja voda;
- c) osiguranja pravičnog pristupa vodama;
- d) poticanja društvenog i privrednog razvoja;
- e) zaštite ekosistema;
- f) smanjenja rizika od poplava i drugih negativnih utjecaja voda;
- g) osiguranja učešća javnosti u donošenju odluka koje se odnose na vode;
- h) sprečavanja i rješavanja sukoba vezanih za zaštitu i korištenje voda;
- i) ispunjavanja obaveza iz međunarodnih ugovora koji su obavezujući za Bosnu i Hercegovinu, a odnose se na područje Kantona.

II. OSNOVNA NAČELA I DEFINICIJE

Član 3. (Opća načela)

(1) Vode su opće dobro i kao takve su pod posebnom zaštitom Bosne i Hercegovine, Federacije BiH, Kantona , grada i općine.

(2) Opća načela na kojima se zasniva upravljanje vodama na području Kantona su:

- a) nekomercijalnosti, prema kojem voda u osnovi nije komercijalni proizvod, već naslijeđe koje se mora čuvati, štiti i shodno tome postupati;
- b) cjelovitosti, koje uzima u obzir prirodne procese i dinamiku voda te međusobnu povezanost i međuzavisnost vodnih i uz vodu vezanih ekosistema;
- c) dugoročne zaštite kvaliteta i racionalne upotrebe raspoloživih količina vode;
- d) osiguranja zaštite od štetnog djelovanja voda, koje proističe iz potreba za zaštitu stanovništva i njihove imovine, uzimajući u obzir djelovanja prirodnih procesa;
- e) ekonomskog vrednovanja voda, koje uključuje troškove opterećenja, zaštite i uređenja voda i zaštite od štetnog djelovanja voda;
- f) učešća javnosti kod donošenja planova upravljanja vodama;
- g) uzimanja u obzir najboljih raspoloživih tehnologija i novih dostignuća nauke o prirodnim zakonitostima i najboljih okolinskih praksi.

Član 4. (Definicije)

Izrazi upotrijebljeni u ovom zakonu imaju sljedeće značenje:

- a) "površinske vode" označavaju sve kopnene vode, izuzev podzemnih voda, prelazne i obalne morske vode, izuzev morskih voda koje pripadaju teritorijalnim vodama;
- b) "kopnene vode" označavaju sve stajaće ili tekuće vode na površini kopna i sve podzemne vode na kopnenoj strani od linije od koje se mjeri širina teritorijalnih voda;
- c) "podzemne vode" označavaju sve vode ispod površine zemlje u zasićenoj zoni i koje su u direktnom kontaktu sa površinskim i podzemnim slojevima zemljišta;
- d) "rijeka" označava vodu koja najvećim dijelom teče po površini zemlje, ali koja može, jednim dijelom svog toka, teći i ispod zemlje;
- e) "obalne morske vode" označavaju površinske vode na strani prema kopnu, ograničene linijom čija je svaka točka udaljena jednu morsku milju od granične linije na kojoj se mjeri širina teritorijalnih voda, a gdje je to slučaj, od spoljne granice prelaznih voda;
- f) "prelazne vode" označavaju površinske vode u blizini ušća rijeka u more, koje su po karakteru djelimično slane uslijed blizine obalnih voda, ali su pod znatnim uticajem doticaja svježe vode;
- g) "vodotok" označava korito tekuće vode zajedno sa obalama i vodom koja njime stalno ili povremeno teče;
- h) "korito" označava terensko udubljenje kroz koje stalno ili povremeno teče voda;
- i) "režim voda" označava niz hidroloških, hidromorfoloških, hidrauličkih, hemijskih i bioloških svojstava površinskih i podzemnih voda u određenom području i u određenom vremenu;

- j) "promjena režima voda" označava sve promjene u režimu voda, nastalih kao rezultat prirodnih sila ili ljudskih aktivnosti;
- k) "ekosistemi" označavaju akvatične, polu-akvatične i kopnene ekosisteme koji su direktno ili indirektno zavisni od voda;
- l) "riječni bazen (sliv)" označava površinu zemljišta sa kojeg se sve površinsko oticanje slijeva mrežom potoka, rijeka i eventualno jezera prema ušću, estuariji ili delti u more;
- m) "podbazen (podsliv)" označava površinu zemljišta sa kojeg se sve površinsko oticanje slijeva mrežom potoka, rijeka i eventualno jezera prema određenoj tački vodotoka (obično je to ušće u drugu rijeku ili jezero);
- n) "vodno područje (distrikt)" označava područja kopna i mora, koje čini jedan ili više susjednih riječnih bazena (slivova) zajedno sa njima pripadajućim podzemnim i obalnim morskim vodama, koje je određeno kao osnovna jedinica za upravljanje vodama;
- o) "prekogranične vode" označavaju vode koje čine ili presijecaju granicu Bosne i Hercegovine;
- p) "vodno tijelo površinskih voda" označava izolovan i posebno posmatran dio površinske vode, kao što je jezero, potok, rijeka ili kanal, dio potoka, rijeke ili kanala, prelazne vode ili pojas obalne morske vode;
- q) "stanje površinskih voda" označava stanje vodnog tijela površinskih voda, koje je određeno njegovim ekološkim ili hemijskim stanjem, uzimajući ono koje je lošije;
- r) "ekološko stanje" označava kvalitet strukture i funkcije ekosistema površinskih voda;
- s) "hemijsko stanje" označava stepen hemijskog zagađenja voda;
- t) "vještačko vodno tijelo" označava vodno tijelo površinskih voda nastalo ljudskom djelatnošću;
- u) "jako izmijenjeno vodno tijelo" označava vodno tijelo površinskih voda koje je, zbog fizičkih promjena uzrokovanih ljudskom djelatnošću, značajno promijenilo svoje karakteristike;
- v) "akvifer" označava sloj ispod površine zemlje ili proslojke u stijenama ili drugim geološkim formacijama, koje imaju takvu poroznost i vodopropusnost da omogućuju ili značajan protok podzemne vode ili zahvatanje značajnih količina podzemne vode;
- w) "vodno tijelo podzemnih voda" označava određenu zapreminu podzemne vode unutar jednog ili više akvifera;
- x) "stanje podzemnih voda" označava stanje vodnog tijela podzemnih voda, koje je određeno njegovim kvantitativnim ili hemijskim stanjem, uzimajući ono koje je lošije;
- y) "kvantitativno stanje podzemnih voda" označava stepen u kojem na tijelo podzemnih voda utiče direktno i indirektno crpljenje;
- z) "voda za piće" označava vodu namijenjenu za ljudsku upotrebu koja po kvalitetu odgovara posebnim propisima koje donosi ministarstvo nadležno za pitanja zdravstva;
- aa) "javno vodosnabdijevanje" označava poslove zahvatanja podzemnih ili površinskih voda za snabdijevanje vodom stanovništva, njihovo prečišćavanje do stepena zdravstvene ispravnosti i dovođenja do mjesta potrošnje i

- raspodjele korisnicima voda, ako je ukupna zahvaćena količina veća od 10 m³ na dan;
- bb) "mineralne vode" označavaju podzemne vode koje po svojim karakteristikama odgovaraju posebnim standardima za mineralne vode, a zahvataju se iz bunara ili vrela;
 - cc) "termalne vode" označavaju podzemne vode koje po svojim karakteristikama odgovaraju posebnim standardima za termalne vode, a zahvataju se iz bunara ili vrela;
 - dd) "termo-mineralne vode" označavaju termalne vode sa osobinama mineralnih voda;
 - ee) "direktno ispuštanje u podzemne vode" označava ispuštanje zagađenja u podzemne vode bez filtracije kroz površinske ili podzemne slojeve zemljišta;
 - ff) "materijal u vodotocima" označava šljunak, pijesak, mulj, bilje i druge slične prirodne ili vještačke materijale koji se uklanjaju iz vodotoka ili sa vodnog dobra, u svrhe njihovog održavanja ili regulisanja;
 - gg) "opasne materije" označavaju materije ili grupu materija koje su toksične, trajne i podložne bio-akumulaciji kao i druge materije ili grupe materija iste ili slične rizičnosti;
 - hh) "prioritetne materije" označavaju materije definisane članom (2) tačka 30. Direktive 2000/60/EC Evropskog parlamenta i Vijeća;
 - ii) "zagađujuća materija" označava svaku materiju sposobnu da prouzrokuje zagađenje, a posebno materije navedene u aneksu VIII Direktive 2000/60/EC Evropskog parlamenta i Vijeća;
 - jj) "otpadna voda" označava vodu koja je promijenila svoje prirodne, fizičke, hemijske ili biološke osobine rezultatom ljudskih aktivnosti;
 - kk) "lice" označava fizičko ili pravno lice;
 - ll) "operator" označava lice koje upravlja ili kontroliše postrojenje ili aktivnost, odnosno lice kojem je u skladu sa zakonom prenijeto takvo ovlašćenje;
 - mm) "aktivnost" označava bilo koju aktivnost koja ima ili može imati uticaj na kvalitet ili kvantitet voda, ekosisteme, na morfologiju vodotoka ili njegovo korišćenje;
 - nn) "zainteresovana strana" označava lice na čije pravo, interes ili obaveze može uticati aktivnost drugog lica;
 - oo) "uređeni inundacioni pojas" označava zemljište između riječnog korita i spoljnog (vodnog) ruba odbrambenog nasipa;
 - pp) "urbano područje" označava jedno naselje ili više naselja koja predstavljaju prostornu urbanu cjelinu ili prostorno - funkcionalno međusobno povezanu cjelinu, utvrđenih Prostornim planom Federacije, kantona, grada i opštine, prema propisima o prostornom planiranju.

III. RAZVRSTAVANJE POVRŠINSKIH VODA, VODNO DOBRO I VODNI OBJEKTI

Član 5. (Površinske vode)

(1) Površinske vode obuhvataju tekuće vode i stajaće vode.

(2) Tekuće vode su prirodni vodotoci kao što su bujice, potoci i rijeke, bez obzira na to da li imaju stalan ili povremen tok.

(3) Tekuće vode obuhvataju i regulisane vodotoke, vodotoke koji su nastali izmještanjem prirodnog vodotoka ili djelimičnim zahvatanjem voda iz prirodnog vodotoka.

(4) Stajaće vode su obalne morske vode, prirodna jezera, uključujući i ona koja povremeno presušuju, bare, močvare i druge prirodne vodne akumulacije, koje imaju stalan ili povremen dotok ili oticaj površinskih ili podzemnih voda.

(5) Stajaće vode su i vodne akumulacije, koje su nastale pregrađivanjem tekućih voda ili drugim zahvatima u prostoru.

Član 6.

(Razvrstavanje površinskih voda)

(1) Površinske vode se, prema značaju kojeg imaju za upravljanje vodama, razvrstavaju u vode I kategorije i vode II kategorije.

(2) Vode I kategorije na području Kantona su:

- a) Vodotoci :
- Neretva
 - Bregava
 - Rama
 - Trebišnjica (regulisani dio vodotoka)
 - Trebižat

- b) Vještačke akumulacije:
- Rama
 - Jablanica
 - Grabovica
 - Salakovac
 - Mostar

- c) Prirodna jezera i močvarna područja:
- Boračko jezero
 - Hutovo blato

(3) Vode II kategorije na području Kantona su:

- a) Vodotoci :
- | | | |
|-------------------|--------------------|-------------------------|
| - Lađanica | - Mostarska Bijela | - Gornji i donji Krupac |
| - Župski Krupac | - Buna | - Glogošnica |
| - Šištica | - Bunica | - Doljanka |
| - Konjička Bijela | - Rama | - Drežanka |
| - Idbar | - Radobolja | - Trešanica |
| - Ljuta dindolka | - Jasenica | - Konjička Ljuta |
| - Rakitnica | - Neretvica | - Lukoć |
| - Radimlja | | |

b) Obalne morske vode

c) i sve preostale vode II kategorije na području Kantona definisane Federalnim zakonom.

Član 7. (Vodno dobro)

(1) Vodno dobro u smislu ovog Zakona, jeste skup zemljišnih čestica koje obuhvataju:

- a) zemljište na kojem je površinska voda trajno ili povremeno prisutna i zbog toga se oblikuju posebni hidrološki, geomorfološki i biološki odnosi, koji određuju vodne i o vodi ovisne ekosisteme;
- b) osnovno korito tekućih voda, uključujući otoke i obale do izrazite geomorfološke promjene;
- c) priobalni pojas širine 5 metara od granice obale (izrazite morfološke promjene) za površinske vode II. kategorije;
- d) zemljište potopljeno stajacim vodama, uključujući obalu do najvišega zabilježenog vodostaja;
- e) napuštena riječna korita koje voda povremeno plavi, močvare i zemljište potopljeno vodom zbog zahvata u prostoru;
- f) uređeni inundacijski pojas;
- g) zemljište ispod i pored vodnih objekata iz člana 10. stav (2) tačka a) ovog Zakona.

(2) Bez obzira na odredbe stava (1) tačke c) ovog člana, Vlada Federacije Bosne i Hercegovine (u daljnjem tekstu: Vlada Federacije) može odrediti drukčiju širinu zemljišta priobalnog pojasa, ako je to potrebno radi: zaštite voda, zaštite od štetna djelovanja voda, omogućavanja opće uporabe voda i djelovanja mjerodavnih institucija kojima su dodijeljena javna ovlaštenja prema ovome Zakonu i Federalnom zakonu.

(3) Vodno dobro, osim u vlasništvu Federacije, može biti u vlasništvu grada/općine, pravne ili fizičke osobe.

(4) U slučaju prodaje zemljišne čestice u vlasništvu pravne ili fizičke osobe koja pripada vodnom dobru za površinske vode II. kategorije pravo preče kupnje ima grad/općina.

(5) Kantonalno ministarstvo nadležno za vode (u daljem tekstu: Kantonalno ministarstvo) utvrđuje granicu vodnog dobra za površinske vode II kategorije u skladu sa podzakonskim propisom donesenim u skladu sa Federalnim zakonom.

(6) Granica vodnog dobra iz stava (5) ovog člana upisuje se u zemljišni katastar.

Član 8. (Javno vodno dobro)

(1) Zemljišne čestice iz člana 7. stava (1) ovog Zakona, koje pripadaju vodnom dobru površinskih voda II kategorije, a koje su upisane u zemljišnim knjigama kao javno dobro, državno vlasništvo ili vlasništvo grada ili općine, odnosno koje su na temelju zakona postale državno vlasništvo, čine javno vodno dobro za sve površinske vode II kategorije.

(2) Javnim vodnim dobrom iz stava (1) ovog člana smatraju se, sve do dokaza suprotnog, i one zemljišne čestice iz člana 7. stav (1) ovog Zakona koje do dana stupanja na snagu ovog Zakona nisu bile upisane u zemljišne knjige, odnosno koje su upisane u zemljišne knjige, ali nitko nije naveden kao njihov vlasnik.

(3) Javno vodno dobro iz stava (1) ovog člana je dobro od općega interesa i u vlasništvu je grada i općina za sve površinske vode II kategorije.

(4) Ovlasti upravljanja javnim vodnim dobrom iz stava (1) ovog člana vrše tijela vlasti, pravne osobe i druge institucije, u obimu i na način propisan ovim zakonom ili drugim aktima mjerodavna tijela kojima je preneseno pravo upravljanja javnim vodnim dobrom.

(5) Rješenjem Kantonalnog ministra nadležnog za vode (u daljem tekstu: Kantonalnog ministra) utvrđuje se pripadnost zemljišne čestice iz stava (1) ovog člana javnom vodnom dobru za površinske vode II. kategorije, a u skladu sa podzakonskim propisom donesenim u skladu sa Federalnim zakonom.

(6) Javno vodno dobro iz stava (1) i stava (2) ovog člana ne može biti predmet prometa, ali može, u skladu sa podzakonskim propisom donesenim u skladu sa Federalnim zakonom, biti predmet ograničenog prava korištenja u formi zakupa.

Član 9.

(1) Zemljišna čestica iz člana 8. stav (1) ovog zakona prestaje biti dijelom javnog vodnog dobra pod sljedećim uvjetima :

- a) ukoliko se rješenjem Kantonalnog ministra utvrdi da ta čestica prestaje ispunjavati uvjete vodnog dobra iz člana 7. stava (1) ovog zakona;
- b) donošenjem odluke Vlade Federacije, kojom je na drugi način, za posebne opće potrebe i namjene, određena upotreba toga javnoga vodnog dobra.

(2) Status javnoga vodnog dobra prestaje datumom upisa promjene statusa u zemljišne knjige, na temelju donesenog rješenja ili odluke iz stava (1) ovog člana.

Član 10.

(Vodni objekti)

(1) Vodni objekti su objekti ili skupovi objekata koji zajedno sa pripadajućim uređajima čine tehničku odnosno tehnološku cjelinu i služe za zaštitu od štetnog djelovanja voda, zahvatanje voda radi njihovog namjenskog korištenja i zaštitu voda od zagađivanja.

- (2) Vodni objekti, u smislu ovog Zakona, s obzirom na njihovu namjenu, su:
- a) Zaštitni objekti na vodotocima koji pripadaju površinskim vodama II. kategorije – nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane s akumulacijama, ustave, retenzije, crpne stanice za obranu od poplava i drugi pripadajući objekti, kao i objekti za zaštitu od erozije i bujica i uređena korita vodotoka u urbanim područjima na površinskim vodama I. kategorije.
 - b) Objekti za odvodnjavanje – osnovna i detaljna odvodna kanalska mreža, crpne stanice za odvodnjavanje i drugi pripadajući objekti.
 - c) Vodni objekti za korištenje voda za:
 - vodoopskrbu (izuzev za opću upotrebu voda) – brane i akumulacije, vodozahvati, bunari, kaptaže sa odgovarajućom opremom, postrojenja za prečišćavanje vode za piće, vodospreme i cjevovodi i drugi pripadajući objekti,
 - snabdjevanje vodom privrednih subjekata - brane i akumulacije, vodozahvati, bunari, kaptaže sa odgovarajućom opremom, cjevovodi i drugi pripadajući objekti,
 - navodnjavanje - brane i akumulacije, dovodni kanali i tuneli, vodozahvatne građevine, crpne stanice, ustave, dovodna i razvodna mreža i drugi pripadajući objekti,
 - korištenje vodnih snaga za proizvodnju električne energije i druge pogonske namjene - brane i akumulacije, vodozahvati, dovodni i odvodni objekti i drugi pripadajući objekti i oprema;
 - ostale namjene – objekti za uzgoj ribe, rekreacijski bazeni, jezera, mlinice i dr.
 - d) Vodni objekti za zaštitu voda od zagađivanja – kolektori za prijem i transport otpadnih voda, postrojenja za prečišćavanje otpadnih voda, ispusti u prijamnik i drugi pripadajući objekti i oprema.

Član 11.

(Zaštitni vodni objekti)

(1) Vodni objekti iz člana 10. stav (2) tačka a) su u vlasništvu jedinica lokalne uprave.

(2) Jedinice lokalne uprave mogu pravo upravljanja i korištenja vodnih objekata iz stava (1) ovog člana prenijeti u nadležnost drugih organa ili pravnih osoba, u obimu i na način propisan ovim Zakonom i aktima jedinica lokalne uprave.

Član 12.

(Vodni objekti za odvodnjavanje)

(1) Vodni objekti iz člana 10. stav (2) tačka b), koji su izgrađeni državnim sredstvima odnosno koji su na temelju zakona postale državno vlasništvo, u vlasništvu su jedinica lokalne uprave.

(2) Jedinice lokalne uprave mogu pravo upravljanja i korištenja vodnih objekata iz stava (1) ovog člana prenijeti u nadležnost drugih organa ili pravnih osoba, u obimu i na način propisan ovim Zakonom ili aktima jedinica lokalne uprave.

(3) Vodni objekti iz stava (1) ovog člana, koje su za svoje potrebe izgradile druge pravne ili fizičke osobe, u njihovom su vlasništvu i oni brinu o upravljanju tim objektima.

Član 13.

(Vodni objekti za vodosnabdjevanje)

(1) Vodni objekti iz člana 10. stav (2) tačka c) alineja 1. u vlasništvu su jedinica lokalne uprave koje su ih izgradile.

(2) Vodnim objektima iz stava (1) ovog člana upravlja pravna osoba kojoj je vlasnik/vlasnici objekta iste prenio na upravljanje, a u skladu sa propisima o komunalnoj djelatnosti.

(3) Vodni objekti iz stava (1) ovog člana, koje su za svoje potrebe izgradile druge pravne ili fizičke osobe, u njihovom su vlasništvu i oni brinu o upravljanju tim objektima.

Član 14.

(Vodni objekti za zaštitu voda od zagađenja)

(1) Vodni objekti iz člana 10. stav (2). tačka d) su u vlasništvu jedinica lokalne uprave koje su ih izgradile.

(2) Vodnim objektima iz stava (1) ovog člana upravlja pravna osoba kojoj je vlasnik/vlasnici objekta iste prenio na upravljanje, a u skladu sa propisima o komunalnoj djelatnosti.

(3) Vodni objekti iz stava (1) ovog člana, koje su za svoje potrebe izgradile druge pravne ili fizičke osobe, u njihovom su vlasništvu i oni brinu o upravljanju tim objektima.

Član 15.

(Vodni objekti za korištenje voda za različite namjene)

(1) Vodni objekti iz člana 10. stav (2) tačka c) alineja 2., 3. i 5., koji su izgrađeni državnim sredstvima odnosno koji su na temelju zakona postale državno vlasništvo, u vlasništvu su jedinica lokalne uprave.

(2) Jedinice lokalne uprave mogu pravo upravljanja i korištenja vodnih objekata iz stava (1) ovog člana prenijeti u nadležnost drugih organa ili pravnih osoba, u obimu i na način propisan ovim Zakonom i aktima jedinica lokalne uprave.

(3) Vodni objekti iz stava (1) ovog člana, koje su za svoje potrebe izgradile druge pravne ili fizičke osobe, u njihovom su vlasništvu i oni brinu o upravljanju tim objektima.

(4) Vodni objekti iz člana 10. stav (2) tačka c) alineja 4. i 5. ovog zakona u vlasništvu su pravnih ili fizičkih osoba koje su izgradile te objekte i/ili koje brinu o upravljanju tim objektima.

Član 16.

(1) Vlasnici odnosno korisnici vodnih objekata iz člana 11., 12., 13., 14. i 15. ovog Zakona dužni su objekte održavati u funkcionalnome stanju i koristiti ih u skladu sa njihovom prirodom i namjenom.

(2) Vlasnik odnosno korisnik vodnog objekta iz stava (1) ovog člana dužan je, u slučaju prestanka upotrebe toga objekta, postupiti u skladu sa vodnim aktom, odnosno objekat održavati u stanju što neće prouzrokovati štete režimu voda i trećim licima.

(3) Ako vlasnik odnosno korisnik ne održava vodni objekat u funkcionalnom stanju i ne koristi ga na način određen u stavu (1) ovog člana, nadležna vodna inspekcija iz člana 76. ovog zakona rješenjem nalaže potrebne mjere.

(4) Vlasnik odnosno korisnik vodnog objekta dužan je vodni objekat održavati i koristiti u skladu sa općim aktom o održavanju, korištenju i osmatranju vodnog objekta i postupanju u slučaju kvara ili havarije na objektu.

(5) Vlasnik odnosno korisnik vodnog objekta dužan je brinuti se o čuvanju vodnih objekata i uređaja na njima od slučajna ili namjerna oštećenja ili uništenja.

(6) Vlasnik/korisnik vodnih objekata iz člana 10. stav (2) tačka a) ovog zakona nije odgovoran za štete trećim osobama nastale zbog neizgrađenosti ili nedovoljne osposobljenosti vodnih objekata.

IV. UPRAVLJANJE VODAMA

Član 17.

(Upravljanje vodama)

Za upravljanje vodama, u smislu člana 1. ovog Zakona mjerodavna je Bosna i Hercegovina, Federacija BiH, Kanton, grad i općina, na način utvrđen ovim zakonom i Federalnim zakonom.

Član 18.

(Ciljevi upravljanja vodama)

Ciljevi upravljanja vodama su postizanje dobrog stanja, odnosno dobrog ekološkog potencijala površinskih i podzemnih voda, odnosno vodnih i uz vodu vezanih ekosistema, umanjenje šteta prouzrokovanih raznim štetnim djelovanjem voda, osiguranje potrebnih količina vode odgovarajuće kvalitete za razne namjene i podsticanje održiva korištenja voda, uzimajući u obzir dugoročnu zaštitu raspoloživih izvorišta i njihove kvalitete.

Član 19.

(Teritorijalne osnove upravljanja vodama)

- (1) Osnovna teritorijalna jedinica za upravljanje vodama je vodno područje.
- (2) Područje Kantona, u skladu sa odredbama Federalnog zakona, u cjelini pripada vodnom području Jadranskog mora.

Član 20.

(Politika upravljanja vodama)

Kanton i grad/općine dužni su sprovesti politiku upravljanja vodama utvrđenu strateškim i planskim dokumentima donesenim na osnovu ovog Zakona i Federalnog zakona.

V. KORIŠTENJE VODA

Član 21.

(Korištenje voda)

- (1) Korištenje voda, prema ovome Zakonu, obuhvata:
 - a) zahvatanje, crpljenje i upotrebu površinskih i podzemnih voda za različite namjene (snabdjevanje vodom za piće, sanitarne i tehnološke potrebe, navodnjavanje i dr.),
 - b) korištenje vodnih snaga za proizvodnju električne energije i druge pogonske namjene,
 - c) korištenje voda za uzgoj ribe,
 - d) korištenje voda za plovidbu,
 - e) korištenje voda za sport, kupanje, rekreaciju i druge slične namjene.
- (2) Korištenje vode kao prirodnog bogatstva u privredne svrhe definisane stavom 1. tačkom a) samo korištenje vode za tehnološke potrebe i tačkom b) korištenje vodnih snaga za proizvodnju električne energije i druge pogonske namjene ovog člana smatra se korištenjem vode kao prirodnog bogatstva od posebnog značaja za Kanton.

Član 22.

(1) Svakomu je dozvoljeno korištenje voda pod uvjetima određenim ovim Zakonom i Federalnim zakonom.

(2) Voda se mora koristiti racionalno i ekonomično. Svaki je korisnik vode dužan koristiti se vodom na način i u obimu kojim se voda čuva od rasipanja i štetnih promjena njezina svojstva (kvalitete) i omogućuje zakonsko pravo korištenja voda drugim osobama.

Član 23.

(Opća upotreba vode)

(1) Svakom je dozvoljeno koristiti se vodom običnim načinom koji ne zahtijeva posebne naprave i ne isključuje druge od jednaka korištenja vode (opća upotreba vode).

(2) Opća upotreba vode obuhvata naročito:

- a) zahvatanje vode bez posebnih naprava iz vodotoka i jezera za osnovne potrebe jednoga domaćinstva,
- b) zahvatanje podzemne vode (bunar na vlastitome zemljištu) ili vode s izvora na vlastitome zemljištu, koja se koristi za osnovne potrebe jednoga domaćinstva,
- c) prikupljanje i korištenje oborinskih voda za osnovne potrebe jednoga domaćinstva, koje se skupljaju na vlastitome zemljištu,
- d) rekreaciju na vodama.

(3) Osnovnim se potrebama domaćinstva iz stava (2) ovog člana smatra korištenje vode za piće, održavanje čistoće i slične potrebe u domaćinstvu. Takvim se korištenjem ne smatra korištenje vode za navodnjavanje, te korištenje vode u tehnološkome procesu pri obavljanju privredne djelatnosti.

Član 24.

(1) Za svako korištenje vode koje prelazi obim opće upotrebe iz člana 23. ovog Zakona potrebna je vodna dozvola, u skladu sa ovim Zakonom i Federalnim zakonom

(2) Korištenje vode za snabdjevanje stanovništva vodom za piće, sanitarne potrebe i potrebe protivpožarne zaštite ima prednost u odnosu na korištenje vode za ostale namjene iz člana 21. ovog Zakona.

(3) Pravna i fizička lica koja zahvataju i crpe vodu, osim opće upotrebe vode, dužna su u skladu sa podzakonskim propisom donesenim u skladu sa Federalnim zakonom voditi evidenciju o količinama zahvaćene vode.

Član 25.

(Snabdjevanje vodom za piće)

Zahvatanje vode u svrhu snabdjevanja vodom za piće regulisano je ovim Zakonom, Federalnim zakonom i posebnim propisima, a vodosnabdjevanje kao komunalna djelatnost regulisano je u skladu sa propisima o komunalnim djelatnostima, a što obuhvata obavljanje komunalne djelatnosti, pružanje komunalnih usluga korisnicima, korištenje i održavanje objekata i uređaja komunalne infrastrukture, osnivanje komunalnih društava, načela formiranja cijene komunalne usluge i komunalne naknade, finansiranje komunalnih djelatnosti kao i finansiranje izgradnje objekata i uređaja.

Član 26.

(Program snabdjevanje vodom za piće)

(1) U svrhu provođenja ovog zakona donosi se Program snabdijevanje vodom za piće.

(2) Program snabdijevanje vodom za piće utvrđuju se postojeće i planske potrebe za vodom u svrhu vodosnabdjevanja na prostoru Kantona, te utvrđuje prijedlog korištenja postojećih i planskih izvorišta vode za piće.

(3) Program vodosnabdjevanja donosi Vlada kantona na prijedlog Kantonalnog Ministarstva .

(4) Program snabdijevanje vodom za piće iz stava (1) ovog člana donijet će se u roku do sedam (7) godina od dana stupanja na snagu ovog Zakona.

(5) Program iz stava (4) ovog člana se revidira i dopunjava svakih petnaest (15) godina.

Član 27.

(Korištenje vode iz izvora i podzemnih voda)

(1) Korištenje vode iz izvora i podzemnih voda, osim opće upotrebe vode, može se odobriti samo ako su prethodno obavljene vodoistražni radovi.

(2) Vodoistražnim radovima smatraju se radovi i ispitivanja radi utvrđivanja postojanja, rasprostranjenosti, količine i kvalitete podzemne vode na određenome području.

VI. ZAŠTITA VODA

Član 28.

(Opća zaštita voda)

(1) Ispuštanje otpadne vode direktno u podzemnu vodu je zabranjeno.

(2) Zabranjeno je ispuštanje otpadne vode u prirodno jezero, ribnjak, močvaru i drugu prirodnu vodnu akumulaciju, koja ima stalan ili povremen dotok ili istjecanje površinske ili podzemne vode, kao i u vodnu akumulaciju koja je nastala zbog vađenja ili iskorištavanja mineralne sirovine ili drugoga sličnog zahvata, a koja je u kontaktu s podzemnom vodom.

(3) U prirodnome jezeru, ribnjaku, močvari i drugoj prirodnoj vodnoj akumulaciji, koja ima stalan ili povremen dotok ili isticanje površinske ili podzemne vode, zabranjeno je korištenje vode na način koji bi mogao prouzrokovati ugrožavanje njezina ekološkog ili hemijskog stanja.

(4) Indirektno ispuštanje otpadne vode u površinske vode dozvoljeno je samo na način i pod uvjetima određenim ovim Zakonom, Federalnim zakonom i u skladu sa podzakonskim propisom donesenim u skladu sa Federalnim zakonom.

Član 29.

(Opća obaveza odvodnje i tretmana otpadnih voda)

(1) Fizička i pravna osoba je dužna otpadnu vodu ispuštati u javni kanalizacioni sistem ili na drugi način, u skladu sa odlukom o odvodnji otpadnih voda donesenom u skladu sa propisima o komunalnim djelatnostima.

(2) Odluka iz stava (1) ovog člana sadrži naročito: odredbe o načinu odvodnje otpadnih voda, obavezu priključenja na javni kanalizacioni sistem, uvjete i način ispuštanja otpadnih voda na područjima na kojima nije izgrađen takav sistem, obavezu posebnog odlaganja i odstranjivanja opasnih i drugih materija, te obavezu održavanja javnih kanalizacionih sistema.

(3) Odluku iz stava (1) ovog člana o odvodnji otpadnih voda na području grada, odnosno općine donosi gradsko odnosno općinsko vijeće. U slučaju da se istim sistemom javne odvodnje otpadnih voda odvodi voda s područja više općina/grada, odluku donose općine/grad sporazumno, a u slučaju ne postizanja sporazuma odluku donosi Vlada Kantona.

Član 30.

(Vrste zaštićenih područja)

(1) U cilju uspostave posebne zaštite površinskih i podzemnih voda ili akvatičnih vrsta, područja i vodna tijela mogu se proglasiti zaštićenim područjima.

(2) Zaštićena područja, u smislu ovog zakona, su:

- a) područja namijenjena zahvatanju vode za piće,
- b) područja namijenjena zaštiti ekonomski važnih akvatičnih vrsta,
- c) površinska vodna tijela namijenjena rekreaciji uključujući i područja za kupanje,
- d) područja podložna eutrofikaciji i područja osjetljiva na nitrate,
- e) područja namijenjena zaštiti staništa biljnih i životinjskih vrsta ili akvatičnih vrsta u kojima je održavanje ili poboljšanje stanja voda bitan uvjet za njihov opstanak i reprodukciju.

Član 31.

(Područja zaštite izvorišta vode za piće)

(1) Područje na kojem se nalazi izvorište vode koje se po količini i kvaliteti može koristiti ili se koristi za javno vodosnabdjevanje mora biti zaštićeno od zagađenja i drugih nepovoljnih uticaja na zdravstvenu ispravnost vode ili izdašnost izvorišta.

(2) Na području iz stava (1) ovog člana provodi se zaštita izvorišta utvrđivanjem zona sanitarne zaštite čija se veličina, granice, sanitarni režim, mjere zaštite i drugi uvjeti

određuju u skladu sa podzakonskim propisom donesenim u skladu sa Federalnim zakonom.

(3) Na osnovu propisa iz stava (2) ovog člana i istražnih radova donosi se odluka o provođenju zaštite izvorišta. Odluka sadrži naročito: granice zona sanitarne zaštite, sanitarne i druge uvjete u pojedinim zonama i druge mjere zaštite, zabrane i ograničenja, izvore i način finansiranja za provođenje zaštitnih mjera, nazive tijela i pravne osobe koje će provoditi odluku, te kazne za povredu odredaba te odluke.

Član 32.

(Odluka o zaštiti izvorišta)

(1) Zone sanitarne zaštite i zaštitne mjere utvrđuju se odlukom o provođenju zaštite izvorišta (u daljem tekstu: Odluka o zaštiti izvorišta)

(2) Odluku o zaštiti izvorišta čije se zone sanitarne zaštite prostiru na području jednoga grada ili općine donosi gradsko, odnosno općinsko vijeće.

(3) Odluku o zaštiti izvorišta čije se zone sanitarne zaštite prostiru na području dviju ili više jedinica lokalne uprave na području Kantona donosi Vlada Kantona na prijedlog Ministarstva, uz prethodno pribavljena mišljenja odnosnih općina.

(4) Odluka o zaštiti izvorišta čije se zone sanitarne zaštite prostiru na području dvaju ili više kantona donosi se u skladu sa Federalnim zakonom.

Član 33.

(Područja namijenjena zaštiti ekonomski važnih akvatičnih vrsta)

(1) Zaštita područja na kojima se vrši uzgoj ekonomski važnih akvatičnih vrsta vrši se uspostavljanjem posebne zaštite od zagađivanja i drugih nepovoljnih uticaja na pojedine akvatične vrste, a u skladu sa odredbama Federalnog zakona.

(2) Ovisno o prostiranju zaštićenoga područja iz stava (1) ovog člana, odluku o zaštiti donosi tijelo iz člana 32. stav (2) i (3) ovog zakona odnosno mjerodavno tijelo u skladu sa Federalnim zakonom.

VII. UREĐENJE I ODRŽAVANJE VODOTOKA I DRUGIH VODA I ZAŠTITA OD ŠTETNOG DJELOVANJA VODA

Član 34.

(Uređenje vodotoka i drugih voda)

Uređenje vodotoka i drugih voda u smislu ovog Zakona je održavanje vodotoka i vodnog dobra, kao i drugi radovi kojima se omogućava kontrolisani i neškodljivi protok vode, a sve u skladu sa Federalnim zakonom.

Član 35.

(Zaštita od štetnog djelovanja voda)

(1) Pod zaštitom od štetnog djelovanja voda podrazumijeva se provođenje aktivnosti i mjera u cilju smanjenja ili sprečavanja ugroženosti ljudi i materijalnih dobara od štetnog djelovanja voda i otklanjanje posljedica njihovog djelovanja.

(2) Zaštita od štetnog djelovanja voda odnosi se na odbranu od poplava i leda na vodotocima i zaštitu od erozije i bujica.

(3) Pored zaštite iz stava (2) ovog člana, zaštita od štetnog djelovanja voda obuhvata i mjere zaštite i otklanjanje posljedica prouzrokovanih vanrednim zagađenjem voda.

Član 36.

(Ugrožena područja)

(1) Radi smanjenja stepena ugroženosti ljudi i materijalnih dobara i radi sprovođenja mjera i aktivnosti zaštite od štetnog djelovanja voda, određuje se područje koje je ugroženo:

- a) poplavama (u daljnjem tekstu: poplavno područje);
- b) erozijom površinskih voda (u daljnjem tekstu: erozivno područje).

(2) Područja iz stava (1) ovog člana (u daljnjem tekstu: ugrožena područja) utvrđuju se u skladu sa odredbama Federalnog zakona.

Član 37.

(Obaveze nadležnih nivoa vlasti)

(1) U cilju zaštite od štetnog djelovanja voda, Kanton i grad/općine na ugroženom području osiguravaju, svako u okviru svoje nadležnosti prema odredbama Federalnog i ovog Zakona i drugih zakona, planiranje mjera zaštite, gradnju i upravljanje zaštitnim vodnim objektima, a naročito gradnju nasipa, brana, pregrada, objekata za stabilizaciju dna i obala, objekata za odvođenje unutrašnjih voda i dr.

(2) Obim zaštite od štetnog djelovanja voda i potrebne mjere utvrđuju se u skladu sa podzakonskim aktom donesenim u skladu sa članom 90. stav (3) Federalnog zakona.

Član 38.

(Aktivna odbrana od poplava)

(1) Za vrijeme neposredne opasnosti od pojave velikih (poplavnih) voda Kanton i grad/općina osiguravaju, svako u okviru svoje nadležnosti prema odredbama Federalnog i ovog Zakona, provođenje mjera aktivne odbrane od poplava.

(2) Kantonalni ministar donosi plan o mjerama aktivne odbrane od poplava i načinu njihovog provođenja za područja uz površinske vode II kategorije na području Kantona, u skladu sa podzakonskim propisom donesenim u skladu sa Federalnim zakonom.

(3) Organizacija koja je osnovni nosilac i organizator aktivne odbrane od poplava i leda ona nivou Kantona je Uprava za civilnu zaštitu i vatrogastvo HNK.

Član 39.

(Usklađenost planova zaštite od štetnog djelovanja vode)

Planovi iz člana 37. stav (2) i člana 38. stav (2) ovog Zakona moraju biti usklađeni sa odgovarajućim planovima zaštite od štetnog djelovanja vode za područja uz površinske vode I kategorije na području Kantona.

VIII. INFORMACIONI SISTEM VODA

Član 40.

(Uspostava informacionog sistema voda)

U cilju optimalnog prikupljanja, korištenja i povezivanja osnovnih baza podataka koje čine osnovu za upravljanje vodama na području Kantona uspostavlja se u skladu sa odredbama Federalnog zakona informacioni sistem voda.

IX. VODNI AKTI

Član 41 .

(Vrste vodnih akata)

(1) Radi osiguranja upravljanja vodama i osiguranja pravičnog pristupa vodi svim pravnim i fizičkim osobama ovim se zakonom propisuje način ostvarivanja prava na vodu izdavanjem vodnih akata. Vodni akti u smislu ovog zakona su:

- a) prethodna vodna saglasnost,
- b) vodna saglasnost i
- c) vodna dozvola.

(2) Vodni akti su upravni akti i izdaju se u obliku rješenja, ako ovim zakonom nije drukčije propisano.

(3) Postupak izdavanja vodnih akata provodi se prema pravilima utvrđenim ovim Zakonom, uz supsidijarnu primjenu Zakona o upravnom postupku i prema odredbama podzakonskog akta donesenog u skladu sa Federalnim zakonom.

(4) Protiv rješenja Kantonalnog ministarstva o izdatom vodnom aktu iz stava 1. ovog člana donesenog u skladu sa odredbama ovog Zakona u prvostepenom postupku, žalba se izjavljuje Vladi Hercegovačko-neretvanskog Kantona.

Član 42 .

(Aktivnosti za koje su uvijek potrebni vodni akti)

(1) Prethodna vodna saglasnost, vodna saglasnost i vodna dozvola, u smislu ovog zakona, moraju se pribaviti, bez obzira na njihove utjecaje, za sljedeće aktivnosti:

- a) zahvatanje vode u količini do 10 l/s, u svim privrednim granama i djelatnostima, a naročito za:
 - 1) industriju i energetiku,
 - 2) poljoprivredu,
 - 3) vodosnabdjevanje,
 - 4) uslužne djelatnosti koje u tehnološkome postupku koriste vodu,
 - 5) turističke djelatnosti;
- b) ispuštanje otpadnih voda za naselja koja imaju do 2000 stanovnika;
- c) vađenje materijala iz površinskih voda II kategorije;
- d) izgradnju objekata za iskorištavanje hidroenergije kada je postrojenje locirano na površinskim vodama II kategorije, snage do 5 MW;
- e) izgradnju akumulacije koja je locirana na površinskim vodama II kategorije i nalazi se na području Kantona;
- f) izgradnju objekata za zaštitu od poplava na površinskim vodama II kategorije, ako te aktivnosti ne utječu na površinske vode I kategorije;
- g) izgradnju regionalnih i lokalnih puteva, uključujući i šumske puteve;
- h) izgradnju mostova ili drugih objekata iznad ili u površinskim vodama II kategorije;
- i) uređenje vodotoka na površinskim vodama II kategorije;

(2) Kantonalno ministarstvo je nadležno za izdavanje vodnih akata iz stava (1) ovog člana.

Član 43 .

(Objekti i aktivnosti za koje nisu potrebni vodni akti)

(1) Vodni akti nisu potrebni za korištenje vode koje ne prelazi obim opće upotrebe vode iz člana 23. ovog Zakona.

(2) Vodni akti nisu potrebni za gašenje požara i poduzimanje hitnih sanitarnih i drugih mjera u slučaju opće opasnosti.

(3) Vodni akti nisu potrebni za objekte i aktivnosti koji vodu za vršenje privredne ili obrtničke djelatnosti osiguravaju priključkom na javni vodovodni sistem

(4) Vodne akte nije potrebno pribaviti ni za građenje novih i rekonstrukciju postojećih stambenih objekata koji se snabdjevaju vodom priključkom na javni vodovodni sistem.

Član 44. .

(Prethodna vodna saglasnost)

(1) Prethodnom se vodnom saglasnošću odlučuje o postojanju uvjeta za ostvarivanje prava na vodu podnosiocu zahtjeva, kao i način ostvarivanja toga prava, te uvjeti kojima mora udovoljiti dokumentacija za građenje novih, rekonstrukciju ili uklanjanje postojećih objekata i druge aktivnosti koje se ne smatraju građenjem, a mogu trajno, povremeno ili privremeno uticati na promjenu režima voda.

(2) Prethodna se vodna saglasnost iz stava (1) ovog člana pribavlja u postupku izdavanja urbanističke saglasnosti i u postupku izdavanja koncesije na vodama i javnom vodnom dobru.

(3) Za objekte ili radove za koje je pribavljena prethodna vodna saglasnost iz stava (1) ovog člana, a za koje nije podnesen zahtjev za izdavanje vodne saglasnosti, prethodna vodna saglasnost prestaje važiti istekom roka od tri godine.

(4) Izuzetno od odredbi stava (3) ovog člana, prethodna vodna saglasnost za vađenje materijala iz vodotoka, a za koje nije podnesen zahtjev za izdavanje vodne saglasnosti, prethodna vodna saglasnost prestaje važiti istekom roka od jedne godine.

Član 45.

(Prethodna vodna saglasnost i koncesije)

(1) Organ mjerodavan za izdavanje koncesije za korištenje vode i javnog vodnog dobra obavezan je, prije pokretanja postupka za dodjelu koncesije, pribaviti prethodnu vodnu saglasnost od mjerodavna tijela u skladu sa odredbama ovog zakona.

(2) Prethodna vodna saglasnost iz stava (1) ovog člana se, nakon provođenja postupka dodjele koncesije, prenosi na pravnu osobu koja je dobila koncesiju.

(3) Pravna osoba iz stava (2) ovog člana dužna je pribaviti ostale vodne akte, u skladu sa odredbama ovog zakona.

Član 46 .

(Vodna saglasnost)

(1) Vodnom se saglasnošću utvrđuje da je dokumentacija priložena uz zahtjev za izdavanje vodne saglasnosti u skladu sa prethodnom vodnom saglasnosti, propisima o vodama i planskim dokumentima.

(2) Odobrenje za građenje novih ili rekonstrukciju postojećih objekata u smislu propisa o prostornom uređenju izdaje se po izdatoj vodnoj saglasnosti za objekte za koje je ovim zakonom propisana obaveza pribavljanja vodne saglasnosti.

(3) Vodna se saglasnost izdaje u skladu sa odredbama člana 52. ovog Zakona, uz ovjeru dokumentacije za građenje, čime se potvrđuje da je ta dokumentacija urađena u skladu sa prethodnom vodnom saglasnosti. Ovjera se vrši upisivanjem broja i stavljanjem otiska pečata tijela mjerodavna za izdavanje vodnog akta na tu dokumentaciju.

(4) Vodna se saglasnost neće izdati ako dokumentacija za građenje ili druge aktivnosti nije urađena u skladu sa prethodnom vodnom saglasnosti.

(5) Za izuzetne slučajeve, za koje nije potrebna vodna dozvola prema odredbama člana 47. stav (1) ovog zakona, sastavni dio vodne saglasnosti su uslovi za uređenje lokaliteta.

(6) Vodna saglasnost prestaje da važi istekom roka od dvije godine od dana njezina izdavanja, ukoliko do toga dana nije pribavljeno odobrenje za građenje i nisu započeti radovi.

(7) Izuzetno, vodna saglasnost za vađenje materijala iz vodotoka, važi za tekuću godinu u kojoj je izdata vodna saglasnost.

Član 47. (Vodna dozvola)

(1) Vodna dozvola potrebna je za sve objekte i aktivnosti za koje je ovim zakonom propisano izdavanje vodne saglasnosti, izuzev za vađenje materijala iz površinskih voda II kategorije i uređenje vodotoka iz člana 34. ovog zakona.

(2) Ako se, zbog promjene u tehnologiji ili iz drugih razloga, naknadno izmijeni obim i uslovi korištenja vode odnosno ispuštanje otpadnih voda u površinske vode, potrebna je nova vodna dozvola.

Član 48.

(1) Vodnom se dozvolom utvrđuje namjena, način i uvjeti iskorištavanja vode, režim rada objekata i postrojenja i način i uvjeti ispuštanja otpadnih voda.

(2) Vodnom se dozvolom utvrđuje da su ispunjeni uvjeti određeni vodnom saglasnošću i da je uz zahtjev za izdavanje vodne dozvole priložen opći akt iz člana 16. stav (4) ovog zakona, ukoliko je to propisano, a koji se donosi prije izdavanja vodne dozvole.

Član 49.

(1) Vodna dozvola izdaje se na određeno vrijeme, a najduže do 15 godina.

(2) Pravo stečeno na osnovu vodne dozvole, ne može se prenositi na drugu pravnu i fizičku osobu bez saglasnosti tijela koje je istu izdalo.

(3) Izdavanje vodne dozvole prethodi izdavanju upotrebne dozvole u smislu propisa o građenju.

Član 50.

(1) Vodna dozvola prestaje važiti:

- a) istekom roka važnosti vodne dozvole,
- b) korisnikovim odricanjem prava iz vodne dozvole,
- c) nekorištenjem prava iz vodne dozvole bez opravdanih razloga duže od dvije godine.

(2) Rješenje o utvrđivanju prestanka prava u smislu odredbe iz stava (1) ovog člana donosi tijelo koje je izdalo vodnu dozvolu.

Član 51.

(Obaveze budućeg imaoća prava na korištenje voda)

(1) Vodnim se aktom može odrediti da budući imalac prava na korištenje voda mora, kod planiranja, izgradnje i rada objekta, omogućiti i korištenje tog objekta za zaštitu od štetnoga djelovanja voda.

(2) Vodnim se aktom može odrediti da budući imalac prava na korištenje voda mora omogućiti korištenje vodnog objekta za opću upotrebu vode ili za snabdjevanje vodom za piće, ako to bitno ne pogoršava uvjete ostvarivanja njegova prava.

Član 52.

(Zahtjev za izdavanje vodnog akta)

(1) Vodni se akt izdaje na pisani zahtjev investitora odnosno korisnika, tijela mjerodavnog za izdavanje urbanističke saglasnosti po propisima o prostornom uređenju, tijela mjerodavnog za izdavanje okolinske dozvole ili tijela mjerodavnog za pokretanje postupka za dodjelu koncesija na vodama i javnom vodnome dobru prema propisima o koncesijama.

(2) Uz zahtjev za izdavanje vodnog akta dostavljaju se potrebni podaci o lokalitetu, vrsti i obimu aktivnosti koja se namjerava provesti i tehnička dokumentacija kojom se obrađuje konkretna aktivnost. Vrsta i sadržaj podataka i dokumentacije određuje se u skladu sa podzakonskim propisom donesenim u skladu sa Federalnim zakonom.

(3) Vodni akti kojima se regulira korištenje prekograničnih voda ili ispuštanje otpadnih u prekogranične vode izdaju se u skladu sa procedurama utvrđenim međunarodnim ugovorima ili konvencijama.

(4) Dokumentacija koja se podnosi uz zahtjev za izdavanje vodnog akta mora biti izrađena u skladu sa ovim Zakonom i propisima iz oblasti gradnje.

Član 53 .

(Dodatni zahtjevi prema podnosiocu zahtjeva)

(1) Ovisno o prirodi aktivnosti i njenim očekivanim uticajima, tijelo mjerodavno za izdavanje vodnih akata može zahtijevati dodatne podatke i dopunu dokumentacije.

(2) Dodatne podatke ili dopunu dokumentacije tijelo iz stava (1) ovog člana dužno je zatražiti u pisanome obliku s navođenjem dokumentacije i podataka koji se traže, uz upozorenje podnosiocu zahtjeva o posljedicama koje će nastupiti ako zahtjev ne bude ispunjen. Tražena dokumentacija i podaci dostavljaju se u roku koji odredi tijelo koje vodi postupak.

(3) Ako investitor, korisnik ili mjerodavno tijelo iz člana 52. stav (1) ovog Zakona ne dostavi dokumentaciju u roku koji mu odredi tijelo koje vodi postupak, zahtjev će se za izdavanje vodnog akta odbaciti zaključkom protiv kojeg je dopuštena posebna žalba.

(4) Tijelo mjerodavno za izdavanje vodnih akata može u izdatom vodnom aktu propisati i posebne uslove radi sprečavanja ili ublažavanja negativnih uticaja uzrokovanih aktivnošću koja je predmet akta, radi obaveze zaštite objekta koji je predmet vodnog akta od štetnog djelovanja voda i sl.

Član 54.

(Stručno mišljenje agencije za vode)

Kantonalno ministarstvo, u postupku izdavanja vodnog akta, može zatražiti stručno mišljenje mjesno nadležne agencije za vodno područje.

Član 55.

(Saradnja tijela u postupku izdavanja vodnih akata)

(1) Ako se u postupku izdavanja vodnog akta, a posebno prethodne vodne saglasnosti, utvrdi postojanje razloga koji ukazuju da objekat, instalacija ili aktivnost koji se planiraju ili nalaze na teritoriju Kantona može imati negativne uticaje na vode na teritoriju susjednog kantona/entiteta, Ministarstvo dostavlja podatke i dokumentaciju iz zahtjeva mjerodavnom tijelu susjednog kantona/entiteta i traži mišljenje.

(2) Ako se razlozi iz stava (1) ovog člana odnose na negativne uticaje na vode druge države Ministarstvo je dužno, putem institucije Bosne i Hercegovine mjerodavne za

vode, proslijediti podatke iz dokumentacije mjerodavnom tijelu odnosno države u cilju njegova očitovanja.

Član 56.

(Obavješćavanje zainteresiranih strana i javnosti)

(1) Radi osiguranja sudjelovanja javnosti u radu i rješavanja mogućega sukoba interesa Ministarstvo, prije izdavanja prethodne vodne saglasnosti, može o zahtjevu obavjestiti zainteresirane strane i javnost na području Kantona, putem obavijesti na oglasnoj ploči Ministarstva, oglašavanjem u lokalnome sredstvu javnog informiranja ili u sredstvima javnoga informiranja koja su dostupna javnosti na teritoriju Kantona odnosno i na teritoriju susjednog kantona/entiteta ukoliko se radi o aktivnosti koja može imati negativne utjecaje na vode na teritoriju susjednog kantona/entiteta.

(2) Javno obavješćenje iz stava (1) ovog člana sadrži informacije propisane podzakonskim propisom donesenim u skladu sa Federalnim zakonom.

(3) Ministarstvo je dužno zainteresiranim stranama i javnosti odrediti rok za pisano očitovanje o predloženim aktivnostima iz zahtjeva koji ne može biti duži od 30 dana od dana javnog obavješćavanja, odnosno od dana dostave obavijesti o vođenju postupka.

Član 57.

(Izjašnjenje podnosioca zahtjeva)

(1) Podnosilac zahtjeva ima pravo pisano se očitovati o mišljenju mjerodavnog tijela i o primjedbama i mišljenjima dostavljenim u postupku očitovanja javnosti, zainteresiranih strana i javne rasprave.

(2) Očitovanje iz stava (1) ovog člana podnosilac zahtjeva dostavlja u roku koji određuje tijelo koje vodi postupak. Propuštanje očitovanja u datome roku ne odlaže vođenje postupka.

Član 58.

(Dostavljanje odluke i obavješćavanje)

(1) Rješenje izdatog vodnog akta mora biti dostupno zainteresiranim stranama i javnosti, na njihov zahtjev.

(2) Izdati vodni akt Ministarstvo dostavlja podnosiocu zahtjeva.

(3) Na izdati vodni akt podnosilac zahtjeva i zainteresirana strana imaju pravo žalbe.

Član 59.
(Troškovi postupka)

(1) Troškove postupka izdavanja vodnog akta snosi podnosilac zahtjeva.

(2) O troškovima postupka iz stava (1) ovog člana Ministarstvo odlučuje posebnim zaključkom.

Član 60 .
(Vremensko važenje vodnog akta)

Vodni akti izdaju se na određeno vrijeme utvrđeno odredbama ovog Zakona. Ovisno o tehnološkoj složenosti objekta, vodna se dozvola može izdati i na kraće razdoblje od vremena utvrđenog u članu 49. stav (1) ovog Zakona.

Član 61.
(Izmjene vodnih akata)

(1) Ministarstvo može izmijeniti ranije izdati vodni akt ako:

- a) je izmjena potrebna radi osiguranja snabdjevanja vodom za piće iz član 24. stav (2) ovog Zakona,
- b) su uticaji aktivnosti koja je predmet vodnog akta bitno drukčiji od onih koji su procijenjeni prilikom izdavanja vodnog akta,
- c) bi, zbog uvođenja naprednije tehnologije, uticaji aktivnosti mogli biti bitno smanjeni, bez prevelikih troškova po korisnika,
- d) je izmjena potrebna radi izvršavanja međunarodnih ugovora koje zaključili Bosna i Hercegovina.

(2) Izmjene iz stava (1) ovog člana mjerodavno tijelo ne može izvršiti ako bi one spriječile ili znatno ometale nastav izvođenja aktivnosti.

(3) Zahtjev za izmjenu vodnog akta može podnijeti tijelo inspekcije, nosilac prava iz vodnog akta ili zainteresirana strana. Tijelo koje izdaje vodni akt izmjenu akta pokreće po službenoj dužnosti.

(4) Zahtjev za izmjenu vodnog akta rješava se po istom postupku kao i zahtjev za njegovo izdavanje.

Član 62.
(Privremeno ograničenje i prilagođavanje prava na korištenje voda)

(1) Za osiguranje potrebnih količina i kvalitete vode i očuvanja prirodne ravnoteže vodnih i o vodi ovisnih ekosistema, u slučaju prirodne pojave koja prouzrokuje privremeni nedostatak vode ili nastupi opasnost od štetna djelovanja voda, može se posebnim rješenjem imao prava na korištenje vode privremeno ograničiti, ili obustaviti ili utvrditi obaveza da tehničkim ili drugim mjerama u određenome razdoblju prilagodi ostvarivanje prava na korištenje vode na određenome području.

(2) Osim ograničenja iz stava (1) ovog člana može se na određenome području i privremeno ograničiti ili privremeno obustaviti provođenje prava na korištenje vode, ako dođe do ekološke nesreće, većega oštećenja na vodnim objektima, ili drugih događaja koji prouzrokuju nedostatak vode ili nastupi opasnost od štetnog djelovanja voda.

(3) Kod ograničenja ili prekida korištenja vode iz stava (1) i (2) ovog člana prioritet ima osiguranje vode za piće i vode za zaštitu od požara.

(4) Ako imaoc prava na korištenje ne poštuje ograničenja iz stava (1) i (2) ovog člana, djelomično ili u cijelosti mu se oduzima pravo na korištenje vode.

(5) Zbog privremenog ograničenja ili privremenog prekida ostvarivanja prava na korištenje vode iz stava (1) i (2) ovog člana, imalac prava nema pravo na naknadu štete.

(6) Bez obzira na odredbe iz stava (5) ovog člana, imalac prava na korištenje vode može zahtijevati naknadu štete neposredno od lica koja je prouzrokovala ekološku nesreću, oštećenje vodnog objekta ili drugoga događaja iz stava (2) ovog člana.

(7) Odredbe se iz stava (1) i (2) ovog člana ne odnose na imaoca prava na korištenje vode za snabdjevanje stanovništva vodom za piće.

(8) O oduzimanju prava iz stava (4) ovog člana odlučuje tijelo koje je izdalo vodni akt.

Član 63.

(Nalog)

(1) Ako u roku važenja vodnog akta nastupi okolnost iz člana 62. stav (1) i (2) ovog zakona, tijelo mjerodavno za izdavanje vodnog akta može, radi usklađivanja postupanja s novonastalim uvjetima, izdati nalog.

(2) Nalogom iz stava (1) ovog člana nalaže se korisniku da u određenome roku izvrši neku radnju, izvrši ulaganja ili se uzdrži od nekoga činjenja radi uklanjanja opasnosti od prijetećega ili već nastala poremećaja režima voda.

(3) Na oblik i način izdavanja naloga se na odgovarajući način primjenjuju odredbe o rješenju u upravnome postupku, ako ovim zakonom nije drukčije određeno.

Član 64.

(Izdavanje naloga)

(1) Nalog izdaje isključivo tijelo koje je izdalo vodni akt.

(2) Primjerak naloga dostavlja se kantonalnoj vodnoj inspekciji.

Član 65.

(Prigovor na nalog)

(1) Protiv naloga može se, u roku od sedam dana od dana prijama rješenja, izjaviti prigovor tijelu koje je izdalo nalog.

(2) Prigovor ne odlaže izvršenje izdatog naloga.

(3) Rok za donošenje rješenja po prigovoru na izdati nalog je 15 dana od dana podnošenja prigovora.

Član 66.

(Oduzimanje vodnog akta)

(1) Pravnoj se osobi može privremeno ili trajno oduzeti vodni akt.

(2) Rješenje o oduzimanju vodnog akta donosi Kantonalno ministarstvo.

Član 67.

(Privremeno oduzimanje)

(1) Vodni akt oduzet će se privremeno kada korisnik u roku određenom u nalogu ne obavi radnju, ne izvrši ulaganje ili se ne uzdrži od činjenja naložena u nalogu i ako zbog neizvršenja naloga ne nastupi direktna opasnost po život i zdravlje ljudi ili poremećaj u gospodarstvu.

(2) Vodni se akt može privremeno oduzeti na vrijeme do šest mjeseci, u kom roku se korisniku obustavlja pravo koje je stekao na temelju vodnog akta i u kom roku je korisnik dužan da izvrši radnju zbog koje mu je privremeno oduzet vodni akt.

Član 68.

(Oduzimanje vodnog akta)

Vodni akt oduzima se ako:

- a) u određenome roku korisnik ne obavi radnju, ne izvrši ulaganje ili se ne uzdrži od činjenja naložena u nalogu zbog čega mu je vodni akt privremeno oduzet,
- b) bi neizvršenjem naloga mogla nastupiti ili je nastupila teška i izravna opasnost za život ili zdravlje ljudi, ili ako je došlo do poremećaja u gospodarstvu,
- c) je podnosilac zahtjeva dao netočne podatke koji su mjerodavno tijelo doveli u zabludu u pogledu činjenica odlučujućih za izdavanje vodnog akta,
- d) su uvjeti iz vodnog akta bitno prekršeni, usprkos pisanome upozorenju od tijela inspekcije,
- e) se aktivnost ne vrši u razdoblju od dvije uzastopne godine,
- f) aktivnost uzrokuje utjecaje koji su zabranjeni ovim zakonom, a ti uticaji ne mogu biti spriječeni ili ublaženi izmjenama vodnog akta.

Član 69.

(Postupak oduzimanja vodnog akta)

- (1) Zahtjev za oduzimanje vodnog akta podnosi tijelo inspekcije .
- (2) Kantonalno ministarstvo odmah obavještava nosilaca prava iz vodnog akta o podnesenom zahtjevu za oduzimanje vodnog akta. Nosilac prava iz vodnog akta dužan je dati odgovor na obavijest.
- (3) Nosilac prava iz vodnog akta kome je oduzet vodni akt može zatražiti izdavanje novog vodnog akta, ako ispuni potrebne uvjete utvrđene propisom donesenim u skladu sa Federalnim zakonom.
- (4) Rješenje se o oduzimanju vodnog akta dostavlja federalnom, kantonalnom, gradskom i općinskom tijelima mjerodavnim za prostorno uređenje i zaštitu okoliša .

X. OGRANIČENJA PRAVA VLASNIŠTVA KORISNIKA ZEMLJIŠTA

Član 70.

(Ograničenja prava vlasnika i korisnika zemljišta)

Na vlasnike i korisnike zemljišta, u smislu ovog zakona, primjenjuju se ograničenja prava utvrđena odredbama Federalnog zakona.

XI. ORGANIZACIJA UPRAVLJANJA VODAMA

Član 71.

(Upravljanje vodama na kantonalnom nivou)

- (1) Upravljanje vodama na Kantonalnom nivou ostvaruje se preko Kantonalnog ministarstva.
- (2) Zadatak Kantonalnog ministarstva je da obezbijedi uslove za trajno i nesmetano obavljanje poslova kojima se ostvaruje upravljanje vodama na Kantonalnom nivou, na način i u obimu utvrđenim planskim dokumentima koji se donose na osnovu ovog Zakona i Federalnog zakona.

XII. FINANSIRANJE UPRAVLJANJA VODAMA

Član 72.

(Izvori sredstava)

Sredstva za obavljanje poslova i zadataka određenih ovim Zakonom osiguravaju se iz:

- a) dijela opće vodne naknade, dijela posebnih vodnih naknada i prihoda prikupljenih na osnovu zakupa javnog vodnog dobra koje u skladu sa odredbama Federalnog zakona pripadaju kantonu;
- b) prihoda po osnovu zakupa javnog vodnog dobra;
- c) budžeta Kantona;
- d) sredstava osiguranih posebnim zakonima;
- e) kreditnih sredstava;
- f) donacija;
- g) sredstava pravnih lica i građana;
- h) ostalih sredstava u skladu sa zakonom.

Član 73.

(Korištenje prihoda)

(1) Prihodi iz člana 72. stav (1) tačke a) i b) ovog Zakona koriste se za finansiranje aktivnosti koji su ovim Zakonom stavljeni u nadležnost Kantona i sufinansiranja izgradnje i održavanja vodnih objekata iz člana 10. stav (2) tačka a), tačka b) tačka c) alineja 1. i 3. i tačka d) ovog Zakona, a u skladu sa godišnjim planom i programom Kantonalnog ministarstva nadležnog za vode.

(2) Prihodi iz člana 72. stav (1) tačke c), d), e), f), g) i h) ovog Zakona koriste se za finansiranje aktivnosti koji su ovim Zakonom stavljeni u nadležnost Kantona i sufinansiranja izgradnje i održavanja vodnih objekata iz člana 10. stav (2) tačka a), tačka b) tačka c) alineja 1. i 3. i tačka d) ovog Zakona.

Član 74.

(Kantonalna naknada od posebnog značaja za HNK)

(1) Za korisnike općih dobara definisanih u članu 21. stav 2) koji iste koriste bez plaćanja koncesione naknade, a svoju djelatnost obavljaju na području HNK, ovim Zakonom utvrđuje se obaveza plaćanja kantonalna naknade od posebnog značaja za HNK.

(2) Kantonalna naknada od posebnog značaja za HNK se utvrđuje:

- a) za proizvodnju električne energije i druge pogonske namjene u visini od 0,005 KM/kWh proizvedene električne energije i
- b) za korištenje vodne za tehnološke potrebe u visini od 0,005 KM/m³ vode zahvaćene na vodozahvatu

(3) Navedena naknada uplaćivat će se mjesečno po osnovu proizvedene električne energije, odnosno po količini zahvaćene vode na vodozahvatu na depozitni račun Ministarstva finansija HNK kao javni prihod, ekonomski kod 722421 i budžetska organizacija 3701001.

(4) Obračunavanje i plaćanje naknade od posebnog značaja za proizvodnju električne energije i korištenje površinskih i pozemnih voda u tehnološke potrebe vrši se mjesečno, do 15. u mjesecu za prethodni mjesec, za proizvedenu električnu energiju odnosno zahvaćene količine vode.

(5) Prihodi naplaćeni po osnovu kantonalnih naknada iz stava (2) ovog člana koriste se za potrebe Budžeta HNK.

(6) Kontrolu ispravnosti utvrđivanja količina koje čine osnovicu za obračunavanje i plaćanja naknade od posebnog značaja kao i kontrolu pravilnog obračunavanja i plaćanja naknade od posebnog značaja vršit će vodna inspekcija.

(7) Za neplaćanje naknade od posebnog značaja za HNK vodni inspektor izdaje rješenje o obavezi plaćanja na koje žalba ne odlaže izvršenje rješenja.

(8) Ako obveznik plaćanja naknade ne obračuna ili ne uplati naknadu iz stava 1. ovog člana, inspektor koji je izvršio kontrolu uplate sredstava podnosi kod nadležnog Suda prijedlog za prinudno izvršenje ove novčane obaveze, po konačnosti i izvršnosti rješenja o uplati sredstava koje je ispostavio obvezniku.

(9) Danom stupanja na snagu ugovora o koncesiji za korištenje općih dobara iz stava (1) ovog člana korisniku prestaje obaveza plaćanja naknade od posebnog značaja za HNK

XIII. NADZOR NAD PROVOĐENJEM OVOG ZAKONA

Član 75.

(Nadzor)

Kantonalno ministarstvo vrši upravni nadzor nad provođenjem ovog Zakona i propisa donesenih na osnovu ovog Zakona.

Član 76.

(Inspekcijski nadzor)

(1) Inspekcijski nadzor nad provođenjem ovog Zakona i propisa donesenih na osnovu ovog Zakona koji su ovim Zakonom stavljeni u nadležnost Kantona, provodi kantonalna vodna inspekcija.

(2) U obavljanju poslova inspekcijskog nadzora kantonalna vodna inspekcija postupa u skladu sa odredbama ovog Zakona.

Član 77.

(Predmet inspekcijskog nadzora)

Inspekcijski nadzor obuhvata:

- a) preduzimanje inspekcijskih radnji na utvrđivanju stanja izvršavanja propisa kod pravnih i fizičkih lica koja su u obavljanju svoje djelatnosti i radu dužna postupati prema odredbama ovog Zakona i propisa donesenih na osnovu ovog Zakona,
- b) određivanje upravnih mjera radi sprečavanja i otklanjanja nezakonitosti u izvršavanju propisa iz tačke a) ovog člana,
- c) preduzimanje drugih mjera određenih ovim Zakonom i drugim propisima.

Član 78
(Ovlaštenja inspektora)

(1) Pored ovlaštenja i dužnosti iz člana 77. ovog Zakona, kantonalni vodni inspektor po ovom Zakonu ovlašten je i dužan da:

- a) zabrani neovlašteno korištenje vode, u smislu odredbi ovog zakona;
- b) zabrani ili ograniči ostvarivanje prava na korištenje vode ako se ona ne koristi u skladu sa vodnom dozvolom;
- c) zabrani izgradnju ili izvođenje zahvata u prostoru ako se ta izgradnja i zahvati izvode bez ili u suprotnosti sa vodnom saglasnosti;
- d) odredi privremeni prekid obavljanja djelatnosti ako se krše odredbe dozvole iz tačke b) stav (1) ovog člana;
- e) zabrani upotrebu objekta i uređaja, ako se koristi bez ili u suprotnosti sa vodnom dozvolom;
- f) zabrani ili ograniči ispuštanje otpadnih voda u površinske vode ili indirektno ispuštanje otpadnih voda u podzemne vode, ako se to ispuštanje vrši u suprotnosti sa odredbama iz podzakonskog akta donesenog u skladu sa Federalnim zakonom i odredi uspostavljanje prvobitnog stanja;
- g) zabrani vađenje materijala iz površinskih voda ako se vađenje tog materijala vrši bez vodnog ili u suprotnosti sa vodnim aktima;
- h) odredi obavezu utvrđivanja štete i naknade štete nastale radnjama iz tačke g) stav (1) ovog člana i obavezu vraćanja u prvobitno stanje,
- i) odredi i druge mjere u skladu sa ovim Zakonom ili na osnovu propisa i vodnih akata donesenih na osnovu ovog Zakona.

(2) Ako je potrebno da se otklone izvori i posljedice prekomjernog zagađivanja vode, kantonalni vodni inspektor može odrediti sanacione mjere ili predložiti Ministarstvu pripremu i sprovođenje sanacionog programa.

Član 79.
(Upravne radnje)

(1) Kantonalni vodni inspektor u izvršavanju poslova inspekcijskog nadzora o utvrđenim činjenicama sačinjava zapisnik.

(2) Kantonalni vodni inspektor donosi pisano rješenje i odmah naređuje njegovo izvršenje ako:

- a) prijeti nastanak neposredne opasnosti od poplava, izlivanja voda ili pogoršanja stanja u toku poplave;
- b) prijeti nastanak nestašice vode ili teškoće u snabdijevanju vodom;
- c) postoji opasnost od zagađenja vode ili je nastupilo zagađenje u obimu u kojem to predstavlja neposrednu opasnost za život i zdravlje ljudi ili za životinjski ili biljni svijet;
- d) postoji neposredna opasnost od zagađenja izvora vode namijenjenog snabdijevanju vodom za piće;
- e) postoji neposredna opasnost od zagađenja površinskih i podzemnih voda;
- f) nastupi suša ili bi iz drugih razloga moglo doći do nestašice vode ili poteškoća u snabdijevanju vodom za piće;
- g) postoji neposredna opasnost od pojave odrona zemlje, klizišta ili drugih vidova erozije;
- h) je to potrebno za osiguranje provođenja opšte upotrebe voda ili za osiguranje stvarne služnosti definisane odredbama . Federalnog zakona, ukoliko se vlasnik ili drugi korisnik vodnog dobra iz člana 7. i 8. ovog zakona ili drugog priobalnog zemljišta suprotstavlja prelasku preko svoje zemlje ili obavljanju radova radi sprovođenja ovog zakona;
- i) je to potrebno za osiguranje izvođenja radova na istraživanju voda, u skladu sa odredbama ovog zakona;
- j) to zahtijevaju i druge hitne situacije određene zakonom;

(3) Izuzetno, Kantonalni vodni inspektor za slučajeve iz tač. a), c), d), g) i j) stava (2) ovog člana može donijeti usmeno rješenje i narediti njegovo izvršenje bez odlaganja, s tim što je dužan donijeti pismeno rješenje najkasnije u roku od osam dana od dana donošenja usmenog rješenja. Sadržaj pismenog rješenja mora odgovarati sadržaju usmenog rješenja.

(4) Ako pravno ili fizičko lice koje je odgovorno za opasnosti i posljedice iz tač. a), c), d), g) i j) stava (2) ovog člana ne postupi odmah po nalogu vodnog inspektora ili ako se ne može identifikovati lice odgovorno za nastanak opasnosti i posljedica, vodna inspekcija će angažovati ovlaštenu instituciju iz člana 80. stav (1) ovog zakona za sprovođenje mjera radi eliminacije opasnosti ili ublažavanja posljedica.

(5) Troškove nastale sprovođenjem mjera iz stava (4) ovog člana snosi Ministarstvo, a te troškove naknadno naplaćuje od odgovornog lica zbog čijeg je djelovanja ili propuštanja djelovanja došlo do nastanka opasnosti, odnosno neželjenih posljedica.

Član 80.

(Stručni poslovi po nalogu inspekcije)

(1) Obavljanje određenih stručnih poslova za potrebe inspekcijskog nadzora (radovi na sprečavanju zagađenja u slučaju akcidenta i čišćenje zagađenja iz vode i vodnog dobra, ispitivanje, ekspertiza i sl.), koji zahtijevaju posebnu tehničku opremu i specijalizovane stručnjake ili primjenu naučnih metoda i postupaka, može se povjeriti ovlašćenim i osposobljenim institucijama (ustanovama, preduzećima, laboratorijama, društvima) koje obavljaju takve poslove, izabranim u skladu sa posebnim propisom.

(2) Institucije iz stava (1) ovog člana, angažuju se na osnovu naloga kantonalnog vodnog inspektora, putem Ministarstva.

Član 81.

(Inspekcijski postupci)

(1) Kada utvrdi da je povrijeđen ovaj Zakon, propis ili drugi akt donesen na osnovu ovog Zakona, kantonalni vodni inspektor zapisnikom konstatuje nepravilnost ili nedostatak i rješenjem određuje mjere i rok za njihovo otklanjanje.

(2) Pored ovlašćenja i dužnosti određenih zakonom, u slučaju iz stava (1) ovog člana, kantonalni vodni inspektor ovlašten je i dužan da:

- a) naredi obustavljanje izvođenja radova ako se vrše protivno vodnom aktu ili se vrše bez vodnog akta, a propisana je obaveza njegovog pribavljanja;
- b) u saradnji sa građevinsko-urbanističkom inspekcijom naredi uklanjanje sagrađenog objekta ili postrojenja izgrađenog bez vodnog akta;
- c) naredi privremenu obustavu rada, odnosno obavljanje djelatnosti pravnog lica ili njegovog dijela ako utvrdi da otpadne vode sadrže opasne materije u količini većoj od dozvoljene ili se zahvataju veće količine vode od dozvoljenih;
- d) zabrani preduzimanje radnji koje nisu dozvoljene ovim Zakonom.

(3) Kantonalni vodni inspektor saraduje sa federalnom vodnom inspekcijom i organom vodne inspekcije susjednih i drugih država o pitanjima nedozvoljene promjene režima voda na kontrolnim profilima međudržavnih vodotoka, u skladu sa međunarodnim ugovorom, sporazumom ili konvencijom koje je zaključila Bosna i Hercegovina.

Član 82

(Pokretanje postupaka)

(1) Kantonalni vodni inspektor je dužan uvijek, kada utvrdi da je učinjeno djelo koje ima obilježje prekršaja propisanog ovim Zakonom, izdati prekršajni nalog odnosno podnijeti zahtjev nadležnom organu za pokretanje prekršajnog postupka.

(2) Kantonalni vodni inspektor je dužan uvijek, kada utvrdi da je učinjeno djelo koje ima obilježja krivičnog djela, čija su obilježja propisana krivičnim zakonom, podnijeti pismenu prijavu nadležnom tužilaštvu.

Član 83

(Žalbe na rješenje vodnog inspektora)

Žalbu na rješenje Kantonalnog vodnog inspektora donesenog na osnovu ovog Zakona i propisa donesenih na osnovu ovog Zakona, u drugom stepenu rješava kantonalni ministar.

XIV. KAZNE NE ODREDBE

Član 84.
(Prekršaji)

(1) Novčanom kaznom u iznosu od 5.000,00 KM do 15.000,00 KM za prekršaj bit će kažnjeno pravno lice:

- a) ako vodni objekat iz člana 10. ovog zakona ne održava u funkcionalnom stanju i ne koristi ga u skladu sa njegovom prirodom i namjenom (član 16. stav (1)),
- b) ako po prestanku upotrebe vodnog objekta iz člana 10. ovog zakona ne postupi u skladu sa odredbama iz člana 16. stav (2) ovog zakona,
- c) ako ne čuva vodni objekat iz člana 10. ovog zakona i uređaje na njemu u skladu sa odredbama iz člana 16. stav (5) ovog zakona,
- d) ako koristi vodu suprotno odredbama iz člana 16. stav (2) ovog zakona,
- e) ako ne vodi evidenciju o količinama zahvaćene vode u skladu sa odredbama iz člana 24. stav (3) ovog zakona,
- f) vrši radnje suprotno odredbama iz člana 28. ovog zakona,
- g) otpadnu vodu ispušta suprotno odredbi iz člana 29. stav (1) ovog zakona,
- h) ako ne provodi odluku o zaštiti izvorišta iz člana 31. stav (3),
- i) ne poštuje zabrane iz odluke o zaštiti ekonomski važnih akvatičnih vrsta iz člana 33. ovog zakona,
- j) ne osigura provođenje mjera aktivne odbrane od poplava u skladu sa članom 38. stav (1)
- k) ako koristi vodu, ispušta otpadne vode u površinske vode i vodno dobro ili vrši druge aktivnosti i zahvate bez pribavljenja vodnog akta, za koje je ovim zakonom propisana obaveza pribavljanja vodnog akta iz člana 42.,
- l) ako koristi vodu, ispušta otpadne vode u površinske vode i vodno dobro ili vrši druge aktivnosti i zahvate suprotno odredbama iz vodnog akta iz člana 42.,
- m) ako po isteku roka važenja vodne suglasnosti za vađenje materijala ne dovede korito i obale vodotoka u stanje predviđeno vodnim aktom iz člana 46. stav (5),
- n) ako ne postupi po rješenju vodnog inspektora iz člana 79. stav (2),

(2) Za prekršaj iz stava (1) ovog člana bit će kažnjeno i odgovorno lice u pravnom licu novčanom kaznom u iznosu od 500,00 KM do 3.000,00 KM.

Član 85.

Novčanom kaznom u iznosu od 100,00 KM do 1.500,00 KM bit će kažnjeno za prekršaj fizičko lice ako:

- a) ako vodni objekat iz člana 10. ovog zakona ne održava u funkcionalnom stanju i ne koristi ga u skladu sa njegovom prirodom i namjenom (član 16. stav (1),
- b) ako po prestanku upotrebe vodnog objekta iz člana 10. ovog zakona ne postupi u skladu sa odredbama iz člana 16. stav (2) ovog zakona,
- c) ako ne čuva vodni objekat iz člana 10. ovog zakona i uređaje na njemu u skladu sa odredbama iz člana 16. stav (5) ovog zakona,

- d) ako koristi vodu suprotno odredbama iz člana 16. stav (2) ovog zakona,
- e) ako ne vodi evidenciju o količinama zahvaćene vode u skladu sa odredbama iz člana 24. stav (3) ovog zakona,
- f) vrši radnje suprotno odredbama iz člana 28. stav ovog zakona,
- g) otpadnu vodu ispušta suprotno odredbi iz člana 29. stav (1) ovog zakona,
- h) ne poštuje zabrane iz odluke o zaštiti ekonomski važnih akvatičnih vrsta iz člana 33. ovog zakona,
- i) ako koristi vodu, ispušta otpadne vode u površinske vode i vodno dobro ili vrši druge aktivnosti i zahvate bez pribavljena vodnog akta, za koje je ovim zakonom propisana obaveza pribavljanja vodnog akta iz člana 42.,
- j) ako koristi vodu, ispušta otpadne vode u površinske vode i vodno dobro ili vrši druge aktivnosti i zahvate suprotno odredbama iz vodnog akta iz člana 42.,
- k) ako po isteku roka važenja vodne suglasnosti za vađenje materijala ne dovede korito i obale vodotoka u stanje predviđeno vodnim aktom iz člana 46. stav (5),
- l) ako ne postupi po rješenju vodnog inspektora iz člana 79. stav (2).

Član 86.

(1) Novčanom kaznom u iznosu od 10.000,00 KM do 15.000,00 KM kaznit će se pravno lice ako ne uplaćuje naknadu iz člana 74. Zakona.

(2) Za prekršaj iz stava (1) ovog člana, novčanom kaznom u iznosu od 2.000,00 KM do 3.000,00 KM kaznit će se i odgovorno lice u pravnom licu.

(3) U slučaju ponovljenog neuplaćivanja naknade iz člana 74., nadležni sud će licima iz stava (1) i (2) ovog člana izreći zabranu vršenja određene djelatnosti, ili narediti zatvaranje poslovnih prostorija, ili nametnuti druga ograničenja u vršenju djelatnosti u period do šest mjeseci, koja se ukažu odgovarajućim u sprječavanju budućeg činjenja prekršaja.

XV. PRELAZNE I ZAVRŠNE ODREDBE

Član 87.

(Planski dokumenti)

Do donošenja planskih dokumenata utvrđenih ovim Zakonom i Federalnim zakonom kao planski dokumenti za upravljanje vodama u Kantonu, odnosno gradu/općinama, koristit će se odgovarajući planski i razvojni dokumenti iz upravljanja vodama doneseni do dana stupanja na snagu ovog Zakona.

Član 88.

(Neriješeni zahtjev i za izdavanje vodnih akata)

Zahtjevi za izdavanje vodnih akata koji su podneseni nadležnom organu prije stupanja na snagu ovog Zakona rješavat će se u skladu sa odredbama Federalnog zakona.

Član 89.
(Postupci po žalbama)

Postupci po žalbama koje nisu riješene do dana stupanja na snagu ovog Zakona rješavat će se u skladu sa Federalnim zakonom.

Član 90.

Odredbe člana 74. ovog Zakona počet će se primjenjivati od 01.07.2013.god.

Član 91.
(Stupanje na snagu)

Ovaj Zakon stupa na snagu danom objavljivanja u „Službenim novinama Hercegovačko-neretvanskog Kantona“.

Bosna i Hercegovina
Federacija Bosne i Hercegovine
HERCEGOVAČKO – NERETVANSKI KANTON
S K U P Š T I N A

Broj: 02-01-XXV-187/13
Mostar: 28.06.2013. godine

P R E D S J E D A V A J U Ć I
Ramiz Jelovac,s.r.